

**Kalaallit Nunaanni ilinniaqqiffiusuni ilinniartitsinerup qaffasissusaata misissorneqarnissaanik imaqartumik misissuinissamik aallartitsinissamut Inatsisartunut aaliangiussassatut siunnersuut. Misissuineq sanilliunneqarsinnaasariaqassaaq misissuinermut nunani killerni allani ingerlanneqarsimasunut assingusunut.**

(Inatsisartunut ilaasortaq Niels Thomsen, Demokraatit)

### **Akissuteqaat**

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

### **Siullermeerinnineq**

Nunatsinni ilinniartitaanerit ingerlaqqiffiusut nunani tamalaani pitsaassutsimut assersuunneqarsinnaanissaat pillugu Inatsisartunut ilaasortaq Niels Thomsen isumaqatigilluinnarpaat. Oqaatigineqarsinnaavoq Ilisimatusarfimmi suleriaatsit periutsillu tulliuuttut atorlugit ilinniartitaanerup ilisimatusarnerullu pitsaasuunissaa ullumikkut qularnaariffigineqarmat:

1. Qinnuteqartut akuerineqarnissamut piunasaqaatinik naammassinissimassapput atuartitsinerlu ilisimatusarnermik tunngaveqassalluni
2. Namminersorlutik Oqartussat avataanit censoreqartitsisarput kalaallinik, danskinik nunanillu allameersunik suliamik ilisimasalinnik ukiuni pingasuni atuuffeqartussanik. Soraarummeernerit pingaarnerpaat censoreqatigiinnit naliliiffigineqartarput tamannalu inuiaqatigiinni naliliinerup pitsaassusianut qularnaveeqqutaalluni
3. Ilinniartitaanerni pineqartuni atuartitsineq ilinniarnissamut aaqquissuussinermi atuutilersitsinnginnermi atuisussanut suleqatinullu (Danmarkimi universitetiukkajuttartunut) tusarniaassutigineqareersimasuni malittarisassaqaartinneqarput
4. Ilinniartitsisut paarlaaqatigiittarneri, tassa avataanit atuartitsisorpassuarnik, taakkununga ilanngullugit lektorinik professorinillu atuartitsinerup ilisimatusarnermik tunngavillip pitsaassusaanik qularnaarisunik atuneq
5. Ilinniartut paarlaaqatigiittarnerat. Ilisimatusarfik nunani tamalaani allaffimmik (Internationalt Kontor) pilersitseqqammerpoq Ilisimatusarfiullu 2010-mit ERASMUS University Charter-imik suleqatigiinnermut ilanngunnissaa naatsorsuutigineqarpoq
6. Ilisimatusartumik suliatigut naliliinermut ataatsimiititaliamit Ilisimatusarfimmit pilersinneqartumit ajunngitsumik nalilerneqarsimasussamik atorfinitsitsineq. Naliliinermut ataatsimiititaliap ilaasortaqassusia apeqqutaatillugu ilaasortaq ataaseq marlulluunniit ilisimatusarfimmit allameersuussapput
7. Ilisimatusartut nunani tamalaani nunatsinnilu atuagassiani ilisimatusarnikkut monografiinik allaaserisanillu saqqummersitsisassapput. Tamatuma saniatigut ilisimatusartut nunani tamalaani ataatsimeersuarnerni ilisimatusarnikkut ilanngussisarput
8. Ilisimatusartut PhD-mik soraarummeernermi, kiisalu adjunktut, lektoritut professoritullu naliliinerni naliliinermut ataatsimiititaliamut peqataasarput.

Ilisimatusarfiup suliassaraa suliaqarfimmini nunani tamalaani qaffasinnerpaap tungaanut ilisimatusarnermik ilinniartitaanermillu ilisimatusarnermik tunngavilimmik ingerlatsinissaq, taamatuttaarlu ilisimatusarnikkut ilinniartitaanikkullu suliaqarfimminik ingerlaavartumik ineriartortitsisartussaluni.

Aqutsineq pillugu inatsisip nutaap "*Ilisimatusarfik pillugu Inatsisartut inatsisaat nr. 19, 19. November 2007-imeersoq*" 1. januar 2008-mi atuutilersinneqarneratigut Ilisimatusarfik aqutsinikkut, suliatigut, aqqissugaanikkut allaffissornikkullu atugassaqaqerpoq ilinniartitaanerit pitsaassusaasa pitsaangorsarneqarnissaat pitsaassutsillu ineriartortinneqarnissaat pisariinnerulersillugu. Ilaatigut taaneqarsinnaavoq ilisimatusarfimmut siulersuisunik pilersitsisoqarsimammat rektoreqarfillu allaffissornikkut ilisimatusarfimmut direktørimik nukittorsarneqarluni.

Tamatuma kinguneraa instituttip ilusaata nutaap 1. januar 2010-mit atuutilernissaa, taassumalu nasatarissavaa Ilisimatusarfimmi instituttit maanna qulingiluaasut institutterujussuarnut pingasunut ataatsimoortinneqarnissaat. Aqqissugaanikkut allannguineri ilaatigut siunertaavoq Ilisimatusarfimmi ilinniartitsisoqarnermik ilisimatusartoqarnermillu naapertuunnerusumik atorluaanikkut atuartitsinerup pitsaasuunissaanik qularnaarinissaq pitsaassutsimillu ineriartortitsinissaq. Tamanna holdini amerlanerusunik inuttalinni ataatsikkut atuartarnikkut atuartitsisarnikkullu, fagini pineqartuni pitsaassutsit atuartitsinerullu qaffasissusianik assigiinnerusumik pilersitsinikkut, ilisimatusarnermut tunngasuni assigiinngitsunik suliallit suleqatigiinnissamut pitsaanagerusumik periarfissinnerisigut, kiisalu ingerlataqarfimnik ataqatigiissaarinissamut periarfissiinerunikkut pissaaq.

Instituttip ilusaanik nutaanik atuutilersitsinerimut peqatigitillugu aqutsineq pillugu inatsimmi §§ 25 aamma 16 naapertorlugit "*Pitsaassutsimik Nutaaliornermillu siuarsaaneq pillugu siunnersuisoqatigiit*"-nnik taaneqartartunik pilersitsisoqassaaq. Siunnersuisoqatigiinnut ilaasortat rektorimit, ilaatigut institutrådimit ilinniartuniillu toqarneqassapput siunnersuisoqatigiinnilu siunertaavoq siulersuisunut, rektoreqarfimmut instituttinilu aqutsisunut il.il. makkununga suut ikiuutaasinnaanerannik suliatigut naliliinikkut siunnersuisarnissaq:

1) Instituttimi ilisimatusarnermik ilinniartitaanermillu ilisimatusarnermik tunngavilimmik nukittorsaaq, aamma 2) insituttip inissisimaneranik nunanilu tamalaani ilisimatusarneq ilinniartitaanerlu pillugit suleqatigiinnermi peqataanermik nukittorsaaq. Kiisalu 3) instituttip ilisimatusarfittut ilinniartarfittullu Ilisimatusarfimmi siunertanik siuarsaqaataaffiusut inissisimaneranik nukittorsaaq.

Tamatuma saniatigut Ilisimatusarfimmi aqutsisut avataanit ilisimasallit peqataaffigisaannik nunanilu tamalaani tunngaviit akuerisaasut malillugit atuartitsinermik aqqissuussaasumik naliliinernik naammassinnialersaarput. Naliliinerni taakkunani aamma ilinniartut, naammassisut, censorit, atuisut ilisimatusartullu naliliinerinik ilaqassapput. Aammattaaq Ilisimatusarfiup nunani tamalaani uuttortaait nunanilu tamalaani pitsaassuseritineqartut naapertorlugit piginnaasaqarfiulersinneqarnissaat sulissutigineqalissaaq. Tamatumunnga atatillugu Ilisimatusarfimmi aqutsisut siusinnerpaamik 2010-mi suleqatigiissitanik nunani tamalaani piginnaasaqarfiit pitsaassusaat sorliit Ilisimatusarfimmut attuumassuteqarnerinik misissuisussanik pilersitsinialersaarput.

Naalackersuisut isumaqarput suliniutit taakku, taakkununga ilanngullugit pingaartumik "Pitsaassutsimik nutaaliornermillu siuarsaaneqarnermut siunnersuisoqatigiinnik" (Kvalitets- og Innovationsfremmerådet) pilersitsineq Ilisimatusarfimmi ilinniartitaanerit pitsaassusiannut, taakkulu nunani tamalaani pitsaassutsimut assersuunneqarsinnaanerannut qularnaveeqqutaalluassasut.

Naggasiutigalugu oqaatigineqarsinnaavoq Ilisimatusarfiup avataani marlunnik ilinniarfeqarmat ingerlaqqiffiusunik, tassalu Sisimiuni issittumi diplomingeniørinngorniarfik Ilulissanilu atorfinin-nissaq siunertaralugu ilisimatusarnerlu tunngavigalugu isumaginninnermi perorsaasunngorniarfik:

Issittumi ingeniørinngorniarneq aaqqissugaanikkut Danmarks Tekniske Universitetimi immikkoor-tortaavoq suliatigullu pitsaassusissatut piumasaqaateqarfiulluni universitetimi tassani piumasaqaa-tigineqartunik. Ilinniartitaaneq ”Danmarks Evalueringsinstitut”-imit naliliiffigineqarlunilu pigin-naatitsiviusarpoq.

Isumaginninnermi perorsaasunngorniarnermi suliatigut pitsaassusissaq nunanilu tamalaani pitsaas-suseq ilaatigut Namminersorlutik Oqartussat avataanit censoreqartitsinerisigut ilinniarnermilu aaq-qissuussinernik akuerinninnerisigut, ilaatigullu nunani avannarlerni perorsaasut ilinniartunik, ilin-niartitsisunik ilisimatusartunillu paarlaasseqatigiittarneq pillugu seminariat qanimut suleqatigi-neqarnerisigut qularnaarneqartarpoq. Kiisalu ilaatigut nunani tamalaani suliatigut attavissarpas-suaqalerfiusumik Peter Sabro-seminariamik aamma Jysk Pædagogseminarium i Danmarkimik sule-qateqarnikkut.

Oqaaseqaatigineqartut siuliani taaneqartut tunuliaqutaralugit aalajangiiffigisassatut siunnersuutip akuerineqannginnissaa Naalakkersuisut inassutigissavaat.